

Plenchi

Bèl a bati

Riiiiing rinnng, bèlèm bèlèm ata e ora a yega...pa nos subi plenchi. Bo plenchi preferí di tur djasabra.

Eksamennan ta den full swing. Efo si ta tras di lomba i awe nos ta dunabu un bista di e selebrashon despues di e último tuts di efo.

Awor ta di warda resultado. Enseñansa avansá ta ketu bai den eksamen. Forsa i sabiduria na kada kandidato.

Mei ta serando su buki pa nos por habri Juni. Si asina mes, e último luna di skol. Dianan a bula ku speed di jet i ku ne nos tambe a bira poko mas madurá. Ban pa e último etapa pa nos por disfrutá di un vakashon bon meresí.

Un bon wikent pa boso. Korda ku mester kuminsa plania kon ta bai entretene e yunan den fakansi. Traha un grupo di mayor i plania huntu ken ta tuma kua dia liber i kiko e programa ta bira.

Korda bin nos ban topa awe riba nos plenchi. Bin pietermaai bin topa ku diferente skol di nos ku lo presentá nan obranan. Boso tur ta invitá for di 10 or te 4 or di atardi. Den e kurá banda di misa di Pietermaai nos plenchi di ambiente lo ta.

Un felis wikènt i di antemano un bon siman.

Ban Topa Skolnan Katóliko

Fecha: 23 mei 2015

Ora: 10.00 - 16.00

Lugá: R.K. Schoolbestuur na Pietermaai

Lo tin presentashon di:
Baile - Kanto
Drama - Tokamentu
ofresé dor di alumnonan

Lo tin eksposishon di obra di man

Animashon musikal di un DJ

Bar i kushina
lo ta bon surti.
Bin purba nos
delisioso grill

Riba roster



Hóbennan di st. Rosa de Lima College trahando EFO



Hóbennan di st. Franciscus College selebrando despues di EFO



Mi ta konta

Soño di tres palu

Algun siglo pasa tabatin 3 mata den flor di nan bida. Manera tur hóben nan tabata kombersá riba nan plannan pa futuro. E promé mata a deskribí su soño asina aki: “Mi lo ta un kaha di tesoro. Mi lo ta yen di oro, plata i piedanan presioso. Lo mi ta nèchi dorná i rondoná ku atmirador pa kontemplá e tesoro ku mi ta karga.

E di dos mata a tuma palabra:”Aki poko aña lo mi ta un barku grandi i poderoso. Mi lo transportá rey i reina riba oséano grandi. Tur ku ta riba mi lo sinti nan sigur paso lo mi ta un barku fuerte.

E último mata a bisa:”Mi ke krese pa mi ta mas règt i grandi posibel, kompará ku otro palunan. Mi lo ta asina haltu ku tur hende lo hisa kara wak

mi. Wak mi ramanan grandi i nan lo pensa riba Dios su grandesa. Nan lo pensa ku mi ta hopi serka di yega den shelu serka Dios.

Pa basta aña e matanan a resa pa nan soño keda kumplí. Nan a krese bira palunan grandi i añanan a sigui pasa.

Despues a drenta algun kapdó di palu den mondi i nan a kuminsá skohe nan palunan preferí pa nan por hasi negoshi ku ne. Un di e kapdónan a wak e promé palu i a disidí di korté pa bendé ku un karpintero. E palu tabata felis i a pensa ku su soño ta bai keda realisá porfin. Ya el a mira su mes konbertí den un kaha di tesoro masha bunita mes.

Ora nan a wak e di dos palu nan tabata di akuerdo ku otro ku nan por bendé ku e trahadó di barkunan. Felis i kontentu palu number dos a bira ku loke el a tende. Ya el a mira su mes kaba den tur su gloria nabegando riba laman.

Ora nan a yega na palu number tres nan no a mira niun funshon fiho pé. Nan a disidí di korté i bai ku né. E palu a bira tristu, paso si nan korte nunca e por sigui krese bira haltu kasi yega shelu.

Ora e karpinté a haña e promé palu, el a traha un baki di kuminda pa su bestianan. E palu a bira masha tristu, paso su soño a kai na awa.

Palu number dos a keda entregá i nan a traha un boto chiki di piskado ku né. E tabata asina chikí ku nan no por a pon'é den laman, nan a poné den un lago. E palu a bira tristu.

Palu number tres a keda kortá den algun tronkon largu pa despues nan wardé den un bodega skur.

Mientras añanan a bai e palunan a lubidá ku un dia nan tabatin soñonan grandi. Nan a konformá nan mes na nan tristu destino.

Algun aña despues un homber i un muhé a yega na e pesebre. E muhe a haña un yui i nan a poné den e pesebre. E palu a bira un pesebre pa karga e tesoro di mas grandi di mundu. E palu tabata felis di konstatá ku su soño a wordu realisá.

Añanan a pasa i un grupo di homber a subi un boto chikí pa piska. Un di e hombernan a drumi mientras e otronan tabata piska. Un tormenta a lanta i e boto tabata kasi pa sink. E hòmber ku tabata na soño a lanta i a bisa:

“Kalma, keda ketu”.

Mesora e tormenta a plakia anto e boto a komprondé ku el a karga e Rei di tur Rei.

Por último algun persona a kue e tablanan den e bodega i nan a klaba nan na otro. Nan a duna un homber pa e karga esaki riba su lomba. Mientras e tabata kana nan tabata grité, insulté, batié i skupié. Despues nan a klaba e homber na e palu. Nan a hisa e palu na laria riba un pida seru i aki e homber a bin muri. Su djadomingu e palu a realisá ku e tabata hopi serka di Dios, paso Hesus a wordu klabá i a muri riba dje.riba dje.

Un preñchi

Studiereis 2014-2015 tabata un eksito pa nos studiantenan di Maris Stella S.B.O. E aña aki nos a haña chèns di bishitá Medellín Colombia pa finalisá nos tareanan pa nos eksamen final. Nos estadia na Colombia tabata un siman kargá ku diferente akitividat interesante manera un bishita na universidat Colegio Mayor einan nos a haña diferente informashon i a interkambiá diferente kos di nos kultura manera un baile típiko di Kòrsou kual ta tambú. Tambe nos por a eksperensia nan manera profeshonal di presentá nan proyekto turístiko. Nos a bishitá diferente sorto di ekskurshonnan manera City tour, Parque Arvi via Metro Cable, Parque Explora na Medellín i tambe nos por a mira diferente arte di e famoso artista Fernando Botero. Nos a bishitá un kas di hende grandi eyan nos a baila ku e hende grandi nan i interkambiá diferente kos di nos kultura ku nan. Tambe nos a bishitá un barío na Medellín eyan nos a hunga futbòl ku e muchanan di menos rekursu, tabata un dia inolvidabel. Na Medellín nos tabatin un guia hopi fantástiko ku nos a siña hopi for di dje i nos a siña hopi tambe di historia di Medellín. Un danki speshial ta bai na Ramsey Frans di RT tours pa hasi nos biahe posibel i tambe na nos ekselente guia Eudelis di Medellín ku a hasi un ekselente trabou. Un danki speshal ta bai na Insel air, Karakter restaurant, CTB i tambe na nos maestronan, mayornan i konosí di alumnonan di klas T3.3a en T3.3b/4.2



Maris Stella VSBO ku biahe di estudio na Colombia



Maris Stella SBO biahe di estudio.

Mucha djispou

Un kolo ku un siboyo ta drumi banda di otro riba kashi di kushina.

E kolo ta blo ta keha su frustrashon.

Kolo: Mi bida ta hopi teribel. Promé nan ta kushiná mi despues nan mes ta kome mi tambe.

Siboyo: Abo ta bon mes. Nan ta kaskami ta bida. Despues nan ta kortami na pida pida. Anto komo sifuera no ta basta e hudasan ta yora tambe mientras nan ta tormentami. Kaba nan ta komemi tambe.